





BOSTON PUBLIC LIBRARY











Ì

HISTOIRE

PRODIGIEVSE DV FANTOSME CAVALIER SOLliciteur, qui s'est battu en duel, le 27. lanuier 1615: pres Paris.

Lest croyable que les combats & les duels estoient frequents

& ordinaires en ces premiers siecles que les hommes viuoient dispercezçà & là par les campagnes & dans les deserts, sans conduitte, sans loix & sansfrein, errats & vagabo nds comme cheuaux eschappez: la rai-soncedoit à la force, le pouuoir estoit la seule regle du deuoir, & la cupidité auoit toutes choses à l'abandon, si bien que la brauade & l'vsurpation estoient les seuls tiltres d'honneur & de valleur.

Mais depuis que les hommes vnis & assemblez ont fondé des villes &

A

des loix pour se dessendre de leurs ennemis & d'eux-mesmes, ils ont commencé de cultiuer leurs pays & leurs moeurs, ils ont inuété les sciences & les arts, & se sont addonnez à la vertu, mesme les Nobles, c'est à dire ceux qui en font profession, desirants s'acquerir quelque perfection par dessus le vulgaire, ont preferé la demeure des champs à celle des villes & des citez, comme plus tranquille, & plus propre pour exercer esgallement leurs corps au trauail, & leurs esprits aux sciéces & à la contemplation; mais come le naturel des hommes se glisse facilement du bien au mal, plusieurs d'entre eux ont degeneré de ce genereux proiect, & n'ont embrasse que des exercices d'excez, & des contemplations d'vn honneur imaginaire qui les porte à ceste premiere barbarie & cruauté, qui diuisoit les hommes quand ils estoient

diuisez, comme sien retournant en ceste mesme solicitude d'ou les premiers hommes sont partis, ils auoiet peu reprendre ce premier naturel insipide & inhumain, qui rendoit autrefois les humains capables & coulpables de la mesme brutalité, si ce n'est que les dæmons se communiquants plus volotiers en pleine campagne, dans les deserts & lieux solitaires, leur eussent causé ces furieules impressions de s'entretuer & coupper la gorge les vns aux autres, iulques là que quelque fantosme ait seruy ces iours passez de second à vn gentilhomme qui s'est battu en duel contre deux siens ennemis, les noms desquels ne sont que trop cogneus par leur propre milere & calamité.

Le faict est estrange & neantmoins veritable, qu'vn Gétilhomme ayant deux querelles differentes & autant d'ennemis, & ayant accepté de cha-

A ij

eun d'eux en particulier le cartel de deffy, serendist (il y a fort peu de temps comme chacun sçait) au lieu assigné, ou l'vn de ses aduersaires se deuoit trouver, dequoy l'autre qui estoit à Paris estant aduerty fust merueilleusement indigné contre l'ennemy de son ennemy de ce qu'il le preuenoit au combat, & le frustroit du fruict de la victoire qu'il esperoit remporter luy mesme, si bien que montant à cheual & courant à bride abatue au lieu ou ils estoient, les ayat rencontrez en la premiere posture que font les combattants qui commencentà venir aux mains, il leur fist le holà, & addressant incontinent sa paroleà celuy qui concurroit en haine auec luy, n'ayants qu'vn mesme ennemy, luy distauec quelque leger blaspheme qu'il ne luy appartenoit pas de vuider sa querelle auparauant la sienne, soit qu'il fust le premier en

datte, soit que sa querelle fust de plus grande consequence, soit que le sort du combat venant à tomber sur leur ennemy commun, il luy depleust de n'audir plus à combattre que les manes d'vn deffunct; l'autre au contraire desia tout eschausse, tout ardent au combat encommencé, n'estimant pas bien seant de quitter la place à ce dernier venu, ne manquoit pas de viues raisons pour monstrer qu'il se deuoit battre le premier, auec vne ferme resolution d'empescher son dessein au cas qu'il eust voulu entreprendre sur son marché, de sorte que peu s'en fallust que ces deux champions ne fissent vne eternelle paix auec leur ennemy s'entretuant l'vn l'autre sur le nouveau differend qui suruinst entre eux à qui se battroit le premier. Mais quoy? le courage ne manquoit pasautroisiesme pour les empescher de se battre, parce qu'il

A iii

les avoit desia devoué tous deux (l'vn apres l'autre toutesfois) à sa dextre, c'est pour quoy il les prioit de se reserver au sacrifice qu'il en vouloit faire.

En sin apres de grandes altercations il sust resolu qu'ils s'en irosent tous trois sur le grad chemin passant qui conduist au Bourg la Reine peu essoigné du lieu où ils estoient, & que le premier Gentilhomme qui se presenteroir à leurs yeux, seroit coniuré pareux d'assister celuy qui estoit seul.

Ils n'attendirent pas long téps, qu'ils apperceurent vn Caualier à eux incogneu qui venoit à Paris, & auquel l'vn d'eux demanda s'il estoit Gentilhomme, à quoy ayant faich responce que vrayement il l'estoit, & d'ancienne extraction, ils luy replique-rent aussi tost, que puis qu'il estoit tel il ne les tesuseroit pas d'vne priere

qu'ils luy vouloient faire, qui estoit dese battre auec eux, & seruir de second à ce Gentil-homme duquel ils estoient ennemis; Ceste priere sembla de prime abord desplaire à ce Caualier, qui s'excusa d'estre de la partie, sur ce qu'il disoit estre pressé d'acheuer son voyage, & venir à Paris pour vn procez de consequeuce, fon Procureur & Aduocat luy ayant mandé que sa presence y estoit requise, mesme il leur monstroit les armes dont il esperoit se battre en ce conflict iudiciaire qui luy estoit plus expedient que le diabolique auquel on le vouloit faire entrer, Mais voyat sa noblesse & son courage estre reuoquez en doute par ces deux ialoux auenturiers d'honneur, il se sentist, piqué de ceste viue pointille du mespris, & leur dist assez froidement, (non toutesfois sans jurer, & comme par maniere d'acquit) pourquoy

m'importunez vous tant, vous voyez qu'il ne m'en prie pas, à peine eust il lasché ceste parolle, que de la bouché de ce Gentil-homme qui auoit besoing de luy, sortirét des prieres & supplications, auec des protestations de luy en auoir toute sa vie (s'il en reschappoit) des ressentiments & obligations infiniment grandes, qui eufsent peu esmouuoir yn diable mesmeà le battré, eust il esté aussi poltron que celuy de Rabelais, ce Caualier donc prestant son consentement à ceste priere, & ne luy semblant hors de propos de vuider cest incident auparauant que de faire iuger son procez, accopagne ces trois Gentils hommes jusques au lieu assi. gné, & la ces deux valeureux couples de combattants commencerentauce celuy que chacun d'eux auoit en teste vn furieux combat: le Caualier incogneu (que les courtisans appel-

lent aujourd'huy le Solliciteur de procez)renuerse son homme du premier coup & le tuë, & se ioinct en mesme instant auec celuy duquelit s'estoit rendu second, pour en faire autant de celuy qui restoit, & en vint à bout, aussi facilement & prompte. ment que du premiersans aucun retardement de procedures. Ce second victorieux sans vouloir escouter les remerciements de celuy pour lequel il s'estoit exposé, moins encore descouurir quelil estoit remonte à cheual, advertissant ce Gentil homme qu'il eust à soigner à ses affaires, & obtenir grace pour luy & pour son compaignon, & quand à luy qu'il alloit faire les siennes, & disant cela pique son cheual vers Paris, laissant ce Gentilhomme autant estonné de la rencontre d'vn si braue second, comme il estoit content de voirsses ennemis terra fez, cepidumg; recenticade locu.

L'incertitude rend les hommes plus diligents à rechercher la vertu le siecle present n'est pas infertil en curieux qui se peuvent enquerir quel est ce Caualier Solliciteur, (ainsi l'appelle t'on par rifee) la curiositén'a de rien seruy iusques icy, son nom, sa denieure, sa retraicte sont du tout incogneus, on ne rencontre personne qui luy ressemble de visage, de parole ny d'habit: Mais ceux approchent plus pres de la verité qui estiment que c'est vn Demon qui a pris la figure d'vn Caualier, comme il à peu faire, puis que les diables se transforment quelquefois en Anges de lumière. C'est donc ce melme Caualier qui montoit autrefois sur le dos de S. Hilarion, & quilluy apparoissoit quelquefois en forme de gladia. teur auec autres combatants à outrance comme recite S. Hierosme, Psallenti gladiatorum pugna spectaculum prabuit,

car si les Demons se delectent à representer entre eux tels combats de gladiateurs pour tenter les gens de bien, qui doute qu'ils ne se plaisent beaucoup plus de venir aux mains auec les hommes pour les precipiter à la mort? Il est sonuent aduenu que les desesperez & ceux qui tentent Dieu, tels que sont ceux qui se vont battre en duel, ont veu le diable en forme humaine, qui les à incitez à se desfaire, qui d'vne façon, qui d'vne autre, & quand ce sont personnes qui se plaisent à manier les armes, il seur persuade de s'exercer au combat auec luy, comme il aduinst, il y a quinze ou seize ans à vn pauure miserable desesperé, qui auoit perdu quelque notable somme au ieu, le diable s'estant apparu à luy en la forme d'vn soldat de sa cognoissance, le suivist en sa maison, ou estant il luy persuada de tirer des armes auec luy, comme

Bij

par maniere de passetemps, & pour sediuertir, & s'exercerent à l'espec nue long temps teste à teste en vne chambre, sans que le diable luy peust faire aucun mal, Dieune le permettant ainsi, iusques à ce que ce vieux singemettant les armes bas, se mistà faire mille tours de soupplesse, & feignant de luy en vouloir apprendre quelqu'vn, luy fist mettre le col dans vn lacqs attaché au plancher, dont il eust esté estraglésans le secours d'autres personnés de la mésme maison qui survindrent à ce dangereux spe-Stacle. Il n'en est pas ainsi aduenu à ces pauures miserables qui se sont battus auec ce Caualier, vrayement solliciteur, puis que bien souuent pour ie ne sçay quelle friuolle imagination qu'il insinue dans les esprits de ceste courageuse noblesse, il la sollicite & la porte à vn euident & certain deselpoir. Chacun sçait le

conte de ces deux seigneurs qui estoient prests de s'entrecoupper la gorge parce qu'ils portoient mesmes armes (à sçauoir la teste d'vn toreau) si le prudent & plaisant iugement d'vn Roy d'Angleterre ne fust interuenu, par lequel il ordonna que l'vn porteroit pour ses armes la teste d'vn Taureau, & l'autre d'vne vache, & par ce moyen les rendist differents. Et qui sçait si ces deux grandes querelles sur le subiect desquelles ces deux vaillants Caualiers sont demeurez sur la place, ne prouenoient point, ou de ce que l'ombre de l'vn d'eux s'estoit meslee auec celle de son aduersaire,& ce par la faute de l'vn, ou de l'autre, ou de ce qu'ils auoient songé en dormat des songes desaduentageux, & qui touchoient respectiuemet leur honneur, ou de quelque autre semblable contention, c'est ainsi qu'il se faut tenir au point d'honneur, & ne pro-

B iii

diguer sa vie & son sang que pour des offres grandes & signalees.

Courage vertueuse noblesse, vos armes ont passé par tous les coins du monde, le reste des hommes ensemblene peut pas resister à la pointe & au trenchant de vos espees, volontiers, que ne pouuant trouuer ailleurs au monde de plus braues & courageux guerriers que vous mesmes, vous prenez vn singulier plaisir, & ce vous est vne insigne gloire de vous esprouuer les vns contre les autres, vous l'auez faict, & les faictes encore tous les iours, mais vous voyez à present que les Demons veulent estre de la partie, en voicy vn qui a faict paroistre son courage en ce dernier combat, il a faict acte de Gentilhomme. Souuenez-vous donc desormais que vous n'auez plus des hommes à combattre mais des diables, nunc etiam manes, hac intentata manebat sors rerum,

& que vous vous deuez proposer la conqueste des enfers & non pas seule ment empescher que l'enfer n'entreprenne sur la France.









